

修訂日期: 2004/10/12 發行日期: 2006/2/15

發行單位: 中華電子佛典協會 (CBETA) <http://www.cbeta.org>

資料底本: 大正新脩大正藏經 Vol. 17, No. 775

原始資料: 蕭鎮國大德提供, 維習安大德提供之高麗藏 CD 經文, 北美某大德提供

No. 775

佛說四無所畏經

西天譯經三藏朝散大夫試鴻臚卿傳法大師臣施護奉 詔譯

如是我聞。一時佛在舍衛國祇樹給孤獨園。爾時世尊告諸苾芻。汝等諦聽。如來應正等覺。成就四無所畏。於大眾中。轉大法輪。如師子吼。自在無畏。時諸苾芻。聞是語已。五體投地。頂禮佛足。合掌白言。云何如來四無所畏。

佛告苾芻。我於往昔。在大眾中。而作是言。如來成就正等正覺。如是說時。沙門婆羅門。魔梵天人。俱發言曰。此所宣說。非依法教。未曾見聞。有如是事。爾時世尊。於彼眾中。無驚無怖。心得安樂。住無所畏。又復告言。我身清淨。諸漏已盡。如是說時。沙門婆羅門。魔梵天人。俱發言曰。此所宣說。非依法教。未曾見聞。有如是事。爾時世尊。於彼眾中。無驚無怖。心得安樂。住無所畏。復次告言。一障雜染。能障道果。此障若滅。聖道自現。如是說時。沙門婆羅門。魔梵天人。俱發言曰。此所宣說。非依法教。未曾見聞。有如是事。爾時世尊。於彼眾中。無驚無怖。心得安樂。住無所畏。

復次告言。修戒定等。能出生死。盡諸苦報。如是說時。沙門婆羅門。魔梵天人。俱發言曰。此所宣說。非依法教。未曾見聞。有如是事。爾時世尊。於彼眾中。無驚無怖。心得安樂。住無所畏。佛告苾芻。是名如來轉大法輪四無所畏。復次苾芻。亦於八大眾中。具足成就。四無所畏。云何為八。昔於一處。有無數百沙門眾。或住或立或行或坐。互相言曰。往昔佛說如是法相。甚深難解。未曾見聞。為是為非。為虛為實。

爾時如來。聞彼言已。心無怯懼。身無毛豎。自在無畏。如山不動。復次無數百婆羅門眾。無數百剎帝利眾。無數百居士眾。無數百四天王眾。無數百忉利天眾。無數百魔王眾。無數百梵天眾。如是八眾。或住或立或行或坐。互相言曰。往昔佛說如是法相。甚深難解。未曾見聞。為是為非。為虛為實。

爾時如來。聞彼言已。心無怯懼。身無毛豎。自在無畏。如山不動。佛言。苾芻。是名八部大眾之中。得無所畏。即說頌曰。

如來自在轉法輪	昔能成就四無畏
天人魔梵及沙門	聞師章句懷猶豫
身心不動得無畏	利樂一切諸有情

令發無上菩提心 恭敬修行到彼岸

爾時諸大苾芻。聞佛所說。信受奉行。

佛說四無所畏經